

JEDAN GRAD, JEDNA BORBA

Piše ko zna, smije i umije; izlazi kad treba i mora; štampa se u kućnoj radinosti.

BITKA ZA NAŠE VODE!

SPECIJALNO
IZDANJE

Da li ste znali...

... da se širom zemlje planira izgradnja preko 200 mini-hidrocentrala?

Privatni investitori, kao i vlasti, dobro znaju da od njih nema koristi ni lokalna zajednica ni cijelo društvo. Neće tu biti masovnog zapošljavanja i neće za nas ići nikakva zarada – prije ćemo ostati bez pitke vode, a u rijeci na kojoj se izgradi hidrocentrala – života više nema.

Jeste li čuli za Kruščicu?

Kruščica je lijepa, brza rječica u Srednjoj Bosni (kanton Srednjobosanski) koja se spušta sa obronaka planine Vranice i kod Viteza ulijeva u Lašvu. Na tom njenom putu leži i naselje istog imena – Kruščica, koje je dom hrabrih čuvarki i čuvara ove male-velike rijeke!

Zašto se čuva Kruščica?

Na rijeci Kruščici planira se gradnja dvije mini-hidrocentrale; od rijeke u tom slučaju ostaje suho korito, a samo mjesto kao i cijela zemlja žrtvuje još jednu prirodnu ljepotu zarad profita kapitaliste.

Koncesiju i dozvolu za gradnju dobila je firma "Higracon" d.o.o. iz Sarajeva. Direktor Armin Hadžialić tvrde da mještani nemaju razloga za strah i da je sve urađeno u skladu sa propisima i ekološkim standardima. O tome kako ova država poštuje zakone, a kako ih i prave, kad zatreba tajkunima – najbolje svjedoče pokušaji da se hidrocentrale grade u samim nacionalnim parkovima Sutjeska i Una.

Da je sve po zakonu, ponavljaju i iz Ministarstva prostornog uređenja Srednjobosanskog kantona, ali i dodaju da su mještani bili uključeni u javnu raspravu prije izdavanja saglasnosti.

Mještani međutim ističu da 90 posto njih nije ni znalo za njeno održavanje, tako da se na samoj raspravi, od ukupno 2 i po hiljade stanovnika i stanovnica, pojavljuje svega 40 njih!

Ovo je standardna praksa naših vlasti – da pravi tajne javne rasprave, samo za odabrane koji će podržati njihove planove.

Hrabri ljudi iz Kruščice s ovim se nisu pomirili.

Smijenili su Savjet Mjesne zajednice i sami našli advokata koji je uspio pokrenuti istragu nepravilnosti procedure i radi na trajnom obustavljanju radova.

Već mjesec i po dana, od 2. augusta, mještani i mještanke svakodnevno stražare kraj svoje rijeke i vlastitim tijelima je brane od bagera.

Bez obzira na upitnost dozvole, mašine se stalno pokušavaju probiti do korita rijeke, uz podršku policije.

Država na narod šalje specijalce koji tuku nenaoružane i nenasilne, u najvećem broju čuvarKE rijeke, ispisano je nekoliko desetina prekršajnih naloga od po nekoliko stotina maraka po osobi.

Tako se policija koju mi kao građanstvo plaćamo koristi kao privatno obezbjeđenje tajkuna, a naše prirodne ljepote – uništavaju radi njihovog bogaćenja.

vladavina PRAVA = vladavina PARA

BORBA ZA VODU počinje široom Bosne i Hercegovine!

Una, Buna, Sutjeska, Željeznica, Sana, Kruščica - i mnoge druge naše rijeke i vrela su u opasnosti.

Neke od njih su, za sada, spašene ili se za njih i dalje bori, a neke, kao Ugar – nepovratno izgubljene.

Naša voda se krade za profit kapitalista – koncesijama za mini-hidrocentrale, raznim dozvolama za komercijalno crpljenje vrela i privatizacijama vodosnabdijevanja, uništavanjem vodozaštitnih zona i nekontrolisanom gradnjom radi mešetarenja nekretninama. Pretvaraju nas u koloniju koja, u trenutku kad su vode cijele planete najugroženiji a najdragocjeniji prirodni resurs za opstanak čovječanstva i živog svijeta uopšte, gubi kontrolu nad svojom vodom radi profita šačice bogatih.

**Bitka za Kruščicu je stoga dio
odsudne bitke naših generacija - za našu vodu!**

KRUŠČICA BRANI SVOJE!